



6. marts 2026

UPA2026/114

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaannut isertitaqarfiusinnaasunik nutaanik ataatsimut misissueqqullugit, nunap aningaasaqarneranik nukittorsaanissaq aammalu Danmarkimiit ataatsimoortumik tapiissutitigut (bloktilskud) pinngitsuuisinnaassutsip annikillissarnissaa siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup inernera UPA27 nallertinnagu Inatsisartunut agguanneqassaaq.

(Inatsisartunut ilaasortaq Erik Jensen, Siumut)

Tunngavilersuut:

Ullumikkut Kalaallit Nunaata aningaasaqarnera annertuumik aalisarnermit isertitanit kiisalu Danmarkimiit ataatsimoortumik tapiissutitigut tunngaveqarpoq. Aningaasaqarnikkut ineriartortitsineq nukittunerusoq piujuartitsinissamillu tunngaveqartoq qulakkeerniarlugu pingaaruteqarpoq nunap isertitaqarfiusinnaasunik nutaanik ineriartortitsinissamut periarfissai ingerlaavartumik misissorneqartarnissaat.

Kalaallit Nunaata aningaasaqarnikkut tunngaviata nukittorsarneqarnera aningaasaqarnikkut nammineersinnaanerunermik pilersitsisinnaavoq kiisalu atugarissaarnermut, attaveqaasersuutitut aammalu inuussutissarsiornermik ineriartortitsinermut aningaasaliinissamut periarfissanik pitsaanerusunik pilersitsisinnaalluni.

Sumiiffiit arlallit isertitaqarfinnik ineriartortitsivigineqarsinnaasutut isikkoqarput. Taakkununga ilaatigut ilaapput takornariaqarneq, pinngortitap pisuussutaanik atuineq, nioqqutissanik nunanut allanut tuniniaanissamut periarfissat nutaat, nukissiuutit mingutsitsinngitsut ineriartortinneri kiisalu inuussutissarsiutit allat ineriartortitsinissamut periarfissaqarluartut.

Aningaasarsiorinissanut nutaanut aporfilersuutit imaluunniit killilersuutit annerpaartaat allamiinngillat, uatsinniipput qinikkani. Tassa inatsisitigut aalingersaanigut peqqutaqaqaanerpaajupput. Assersuutiginnarlugu nunatsinni pisuussutitsinnik soorlu aalisakkanik qalerualinnillu nalittorsaanerit nunatta avataani ingerlanneqarneri ukiorpassuarni "isiginnaaginnarpagut" oqaluuseriinnarlugillu. Aalingiinerillu uatsinnut pitsaanerulersinniarneqartut inatsisartut inersuani akerlilersorneqalertarlutik – aalisarnermut



inatsit assersuutissatsialaavoq. Qujanaqaarli sapiitsunik aaliangiisinnaassusilinnik Naalakkersuisunik siuleqarsimagatta, suliniutitik siunissamut ungasinnerusumut uagut kalaallit pillugu aaliangersaasimasunik, taamaasilluta ilorraap tungaanut aallarnissat aqutissiuunneqartussanngorlugit aalloriartitsisimasunik. Aammattaaq inuussutissalerinermut tunngasunik ukiorpassuarni aaliangiiniaaluusaarnerpassuit pisartut allat nassuerutigisariaqarpagut, soorlu imermik avammut niuilernissatsinnut tunngasut allarpassuillu inuussutissarsiortuniit ingerlanneqarnissaannut aqutissiuussinigit sulii pitsanngorsartariaqartut ilagaat.

Taamaattumik siunnersuutip siunertaraa Naalakkersuisut peqquneqassasut Kalaallit Nunaannut isertitaqarfiusinnaasunik nutaanik ataatsimut misissueqqullugit, ilanngullugu suliniutit suut nunap aningaasaqarnikkut siunissami ineriartortinneqarneranik nukittorsaasinnaanersut, atugarissaarnerulernissarput anguniarlugu.

Misissuinermi aamma erseqqissarneqartariaqarput periarfissat aningaasaqarnikkut, aarlerinartut kiisalu ineriartortitsinermi periarfissat assigiinngitsut inuiaqatigiinnut sunniutaasinnaasut.

Pisortanut aningaasatigut allaffissornikkullu kingunerisassai:

Misissuineq Naalakkersuisut tungaanit allaffissornikkut aningaasartuuteqartitsissasooq naatsorsuutigineqarpoq, ilaatigut nalunaarusiornermut kiisalu immikkut ilisimasalinnik soqutigisaqatigiinnillu attuumassuteqartunik peqataatitsinermit atatillugu.

Naalakkersuisut aqutsinermit atugassatut immikkoortittariaqagassaat

naatsorsuutigineqarpoq ukiumut AC-fuldmægtitut atorfillip 1- 1,5 nalinga sinnernagu, tassa 500.000 - 750.000 kr.-itut annertutigissasooq. Aningaasatigut kingunerisassat qanoq annertutigissanersut siunissami misissuinerup kingorna siunnersuutigineqarsinnaasunik suliniutitik aalajangersimasunik tunngaveqassapput.

Namminersortunut aningaasaatigut allaffissornikkullu kingunerisassai:

Misissuineq ingerlanneqartillugu siunnersuutip namminersorlutik inuussutissarsiortunut toqqaannartumik kingunerisassai naatsorsuutigineqanngillat. Siunissami suliniutit nutaat inuussutissarsiutitik ingerlatsinerup annertusineranik kiisalu aningaasaliinissamut periarfissanik amerlanerusunik pilersitsisinnaapput.

Innuttaasunut aningaasatigut allaffissornikkullu kingunerisassai:

Misissuineq nammineq ingerlanneqartillugu innuttaasut aningaasatigut imaluunniit allaffissornikkut toqqaannartumik kingunerisassaqaarnissaa naatsorsuutigineqanngilaq. Siunissami aningaasaqarnerup nukittorsarneqarnera inuiaqatigiinni atugassarititaasunik pitsaanerusunik periarfissanillu amerlanerusunik pilersitsisinnaavoq.